

靜觀抒懷

絕句十首

觀 潮

風驅暮色遼，海上月催潮。萬古灘頭浪，難淘一寂寥。

山道暮歸

月露松間靜，花芳濕道濃。蟬鳴悠忘遠，解帶步從容。

獨 坐

雨霽窗前坐，心悠賞後堂。安禪雖未悟，火宅亦清涼。

暮秋晨行

清鳴犯曉雀啼風，赤影驚霞日映楓。縱履迎曦行古道，馳心醉露望長空。

彈 琴

鳴琴不望技稱雄，自在琴心互啟通。韻適何須分雅俗，巴人白雪盡和衷。

春 雨

新霖澹澹浣青氈，紫浸瓊花沁目鮮。瓦漏諧聲音蕩漾，悠然乳燕剪雲煙。

雨 夜

疾雨滂沱驚斷夢，芭蕉雨打漸安寧。迷濛復睡心猶待，柳色青新雨夜經。

夕 望

紅燃落日棲歸燕，紫沸輕霞暗碧山。目極平沙川漫闊，心馳遠海浪飄閒。

觀日出

日破飛霞峰綻耀，雲開霧降隱溪流。三竿日上猶依戀，獨坐樓臺賞嶺幽。

繪春景

丹青欲繪明和景，蝶舞鶯啼卻醉人。臥懶清芳悠忘筆，歸來獨帶一山春。

律詩十二首

郊山行步

秀徑閒悠過，英飄沒步蹤。林喧棲戲鳥，杏顫憩遊蜂。
遠望穹天闊，傾聽麗水淙。風輕幽物外，坐嘯倚青松。

春 思

春煙凝碧樹，翠影入紅樓。杏悅清風暖，江幽翠柳柔。
輕鈴悠鳥詠，茂葉蔽花羞。白鷺沙州立，相偕俱忘愁。

遊宿山中

西峰新月落，北嶺夜初闌。舉目銀河近，沾衣玉露寒。
松濤風迫疾，谷鳥澗流安。欲飲良宵趣，晶杯酒已殘。

遊 寺

世務縈心難悟道，常遊古寺感清幽。塵身暫曠閒雲伴，俗念方休靜水流。
翠隱山光深竹徑，紅飛暮色映禪樓。鶯啼雀噪同趨靜，谷盪鐘聲遠益悠。

四季詠

春 閒

翔鷗沐暖蝶飛翩，碧染清波水色娟。縱日馳情難擬畫，息心感物欲成篇。
慵揮豔墨為新賦，興取閒箏鼓鏞弦。手懶音遲時斷律，悠然止奏臥窗前。

夏 悠

南窗竹亂風流碧，信步田園漫賞妍。日映紅輕花舞馥，雲凝翠重柳垂鮮。
塵寰困憊消鳴雀，淨圃清悠悟詠蟬。旅覽何須名勝景，家居素境亦陶然。

秋 興

萬境殘消又化遷，抒懷感物起悲憐。紅雲映日淒孤雁，白露凝枝絕暮蟬。
落碧風催凋茂樹，流金月曳寂寒川。傷秋未若期春再，覽勝高歌綠柳前。

冬 思

夕冷凝霞雲凍降，冬風竣肅緊衣裳。霜摧錦樹多凋翠，月映寒梅獨綻芳。
鼓噪鴉聲常裊繞，雍容鶴影已蒼茫。何傷萬物隨消長，只嘆奸邪據廟堂。

遊日月潭四詠

朝霧碼頭迎晨曦

波凝霧起縈重嶂，一線丹燃破寂開。碧映長空雲繾綣，金浮遠水浪徘徊。
清新燕翦機心去，縹緲山傳好景來。意暢身輕舒企盼，朝陽滌暗照高臺。

紅塵幽境玄奘寺

暫別人喧參古寺，高僧敬慕志堅深。前銜拉魯①澄潭影，後倚青龍②靜梵音。
樸殿無華藏慧論，幽松有韻啟禪心。如斯願得清平境，遍世長歌擊壤吟。

①拉魯：日月潭中拉魯島。 ②青龍：日月潭青龍山。

湖山夕映文武廟

蒼山日薄光華斂，暮送彤霞映碧湖。聖教千秋傳雅頌，民心百代潤仁儒。
忠貞典範流芳譽，義勇風儀感壯夫。嘆世難行賢哲道，營營遍地斗筲徒。

華燈璀璨伊達邵

喧囂未倦黃昏盡，暮色難沉不夜樓。寂木悲風蟲語滯，歡筵醉夢俚歌流。
疏寥棹火寒煙水，璀璨燈芳耀埠頭。漫映塵光星隱晦，浮雲掩月使人愁。

古體八首

月夜獨行阡陌

中夜出燕居，新月澹雲輕。黑深遠碧落，風清送星明。
緩步離塵囂，踩露入田行。稻花流秋芳，波動蛙聲盈。
犬吠穿竹林，夜雀草叢驚。起興逞快意，長歌和蟲鳴。
俗慮風攜去，怡然逸衷情。

晴日

日麗豔煙花，彩蝶舞婆娑。遠樹送翠來，燕旋縈清歌。
山明橫輕嵐，水媚流金波。天青垂池柳，漪清滌香荷。
芬芳幽微風，晶光閃疏柯。紅熟黃籬果，白悠碧塘鵝。
芳茵酣神醉，敞懷自吟哦。目望白鷺飛，心隨浮雲和。

讀老莊

少讀老莊韋編絕，析理儼然說道玄。及壯常悟言外意，自謂體道已忘筌。
華髮掩卷步逍遙，松下坐忘賞清泉。

落花

未竟春妍冠群豔，風揚落英委泥沙。花逝歸根何須憐，復入化育合物華。

月夜

殘影飛簾映心愁，悵月入窗尋騷客。騷客感物益新傷，難賦愁詞詠月魄。

秋末觀蓮

花葉早隨寒風逝，徒留擎枝舞清漪。不憐殘荷單傷己，塵身在涅卻染淄。

登樓

登樓樓望樓連巒，樓盡縹渺蔽塵煙。忽起清風掃霧霾，卻見濯山繞污川。

春至

寒盡春來又綠柳，春秋榮枯俱惹愁。萬物隨時自流轉，皆是塵心賦喜憂。